

Embargo: Hanya boleh diterbitkan atau disebarkan mulai jam 1200, Jumaat, 4 Julai 2025

KENYATAAN MEDIA



KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

PERDAGANGAN LUAR NEGERI SABAH 2025 JULAI 2025

Perdagangan Sabah kekal kukuh melebihi RM100 bilion selama tiga tahun berturut-turut walaupun menghadapi cabaran landskap ekonomi

PUTRAJAYA, 4 Julai 2025 – Jabatan Perangkaan Malaysia (DOSM) telah menerbitkan **Perangkaan Perdagangan Luar Negeri Sabah, Julai 2025**. Penerbitan ini memaparkan statistik volum dan nilai barangan perdagangan luar negeri Sabah dengan rakan dagangan serta perincian mengikut klasifikasi komoditi.

Mengulas terhadap laporan tersebut, Ketua Perangkawan Malaysia, Dato' Sri Dr. Mohd Uzir Mahidin berkata, “Perdagangan Sabah kekal kukuh apabila mencatat jumlah dagangan sebanyak RM107.8 bilion pada tahun 2024, sekaligus melepasi paras RM100 bilion bagi tiga tahun berturut-turut sejak 2022. Dari segi perbandingan tahun ke tahun, jumlah dagangan Sabah mencatat pertumbuhan sebanyak 2.7 peratus. Eksport Sabah mencatatkan RM61.3 bilion pada 2024, turun sebanyak 2.3 peratus berbanding tahun sebelumnya. Sementara itu, import Sabah meningkat 10.2 peratus, daripada RM42.2 bilion kepada RM46.4 bilion. Pertumbuhan import yang lebih tinggi berbanding eksport menyebabkan imbalan perdagangan mencatatkan susut 27.9 peratus dengan nilai lebihan dagangan yang lebih rendah sebanyak RM14.9 bilion bagi tahun 2024”.

Dato' Sri Dr. Mohd Uzir Mahidin memaklumkan bahawa tiga komoditi yang menyumbang kepada eksport Sabah pada tahun 2024 ialah petroleum mentah bernilai RM21.3 bilion, diikuti oleh minyak kelapa sawit (RM17.3 bilion) dan gas asli cecair (RM4.6 bilion). Secara keseluruhan, eksport ketiga-tiga produk utama ini berjumlah RM43.2 bilion, menyumbang sebanyak 70.4 peratus kepada keseluruhan nilai eksport Sabah. Manakala penyumbang utama import pula adalah produk petroleum bertapis sebanyak RM5.2 bilion, baja dikilangkan (RM1.0 bilion) dan oleokimia berasaskan kelapa sawit (RM266.0 juta).

Ketua Perangkawan Malaysia turut menjelaskan bahawa eksport Sabah meliputi transaksi perdagangan antarabangsa dan antara wilayah iaitu Semenanjung Malaysia dan Sarawak berdasarkan transaksi fizikal di pintu masuk/keluar negeri Sabah. Dari perspektif antarabangsa, jumlah eksport Sabah meningkat 0.9 peratus atau RM338.8 juta berbanding RM38.9 bilion pada tahun sebelumnya. Walau bagaimanapun, eksport Sabah ke Semenanjung Malaysia mencatatkan penyusutan sebanyak 7.2 peratus atau RM1.6 bilion kepada RM20.5 bilion pada tahun 2024. Penurunan ini disebabkan oleh pengurangan eksport bagi beberapa komoditi utama seperti petroleum mentah (-RM1.9 bilion, -10.6%), minyak kelapa sawit (-RM45.2 juta, -6.5%), dan oleokimia berasaskan kelapa sawit (-RM17.2 juta, -44.8%).

Sementara itu, peningkatan import Sabah pada tahun 2024 disokong oleh import yang lebih tinggi dari Semenanjung Malaysia yang meningkat sebanyak 14.9 peratus atau RM3.9 bilion, daripada RM26.0 bilion pada tahun sebelumnya. Di peringkat global, terdapat peningkatan import dari Indonesia (+RM418.4 juta, +49.7%), Thailand (+RM112.0 juta, 7.5%) dan China (+RM101.0 juta, 2.4%). Mengikut kategori umum, peningkatan import Sabah disokong oleh kategori makanan dan minuman, 10.2 peratus dan bekalan perindustrian, 9.0 peratus.

Semenanjung Malaysia menyumbang sebanyak 46.8 peratus daripada jumlah dagangan negeri Sabah. Manakala di peringkat antarabangsa, rakan dagangan utama negeri Sabah adalah China, Thailand, Republik Korea, Jepun dan India dengan sumbangan sebanyak 26.8 peratus.

Jabatan turut menerbitkan Statistik Perdagangan Luar Negeri tahunan bagi 15 negeri yang memberikan nilai perdagangan antarabangsa setiap negeri dengan negara-negara antarabangsa lain bagi tempoh 2019 hingga 2024. Bagi negeri Sabah, nilai yang digunakan adalah nilai perdagangan antarabangsa negeri Sabah tanpa mengambilkira perdagangan negeri Sabah dengan Semenanjung Malaysia dan Sarawak. Bagi tahun 2024, jumlah perdagangan Sabah mengikut nilai tersebut mencatatkan pertumbuhan sebanyak 3.6 peratus kepada RM43.0 bilion daripada RM41.5 bilion pada tahun 2023. Jumlah dagangan ini disumbangkan oleh eksport yang bernilai RM32.1 bilion dan import bernilai RM10.9 bilion. Eksport Sabah mencatatkan peningkatan sebanyak 3.2 peratus kepada RM32.1 bilion pada tahun 2024, berbanding tahun 2023 sebanyak RM31.1 bilion. Import Sabah pada tahun 2024 bernilai RM10.9 bilion, mencatatkan peningkatan sebanyak 5.0 peratus berbanding tahun sebelumnya. Angka yang dinyatakan ini terdapat perbezaan dengan laporan yang diterbitkan pada 16 Jun 2025 berikutan pengemaskinian yang telah dibuat mengikut data terkini.

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang


bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Carta : Eksport, Import, Imbangan Dagangan dan Jumlah Perdagangan Sabah, 2014 – 2024



Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAN MALAYSIA
4 JULAI 2025